

14 AUG 1999

Rusia-pendidikan

IJAZAH PERUBATAN DARI RUSIA MUNGKIN DIIKTIRAF

Oleh: Azman Ujang

KHABAROVSK (Russia), 14 Ogos (Bernama) -- Lebih dari 60 pelajar Malaysia belajar di kolej-kolej perubatan Rusia walaupun ijazah perubatannya tidak diiktiraf di Malaysia.

Menurut duta Malaysia ke Rusia Datuk Yahya Baba, pengiktirafan ijazah dari beberapa kolej perubatan Rusia sedang diusahakan memandangkan kedua-dua negara akan menandatangani Memorandum Persefahaman (Mou) berkaitan kerjasama pendidikan.

Kesemua pelajar Malaysia yang belajar di Rusia adalah pelajar persendirian dan kebanyakannya belajar dalam bidang perubatan di Kursk, kira-kira 400 km dari Moscow.

Yahya berkata tiadanya pengiktirafan ijazah perubatan Rusia setakat ini adalah kerana "kejahilan sistem", Rusia mempunyai beberapa kolej perubatan yang diiktiraf di seluruh dunia, katanya.

"Kedua-dua kerajaan sedang berusaha mengatasi masalah ini dan dijangka akan menandatangani MoU, yang diharapkan akan mengiktiraf ijazah perubatan dari Rusia menjelang hujung tahun ini, katanya kepada pemberita Malaysia sebelum ketibaan Perdana Menteri Datuk Seri Dr Mahathir Mohamad ke Khabarovsk.

Dr Mahathir dijangka tiba di sini esok untuk lawatan seminggu, dan beliau juga akan melawat China dan Republik Buryatia, Rusia di bahagian selatan Siberia.

Yahya berkata soal Malaysia mengiktiraf ijazah asing harus diteliti dan perlu dilakukan secara sistematik.

Beliau berkata kereta Proton Malaysia berada di pasaran Rusia sejak ia mula diperkenalkan tahun lepas.

"Pengedar kereta itu mensasarkan untuk menjual kira-kira 1,000 unit kereta tahun ini tetapi, saya diberitahu setakat ini 300 unit telahpun terjual. Maklum balas yang diterima daripada pembeli, mereka gembira dengan kereta tersebut," katanya.

Yahya berkata Malaysia bekerja sama dengan Rusia dalam teknologi angkasa, terutamanya dalam pelancaran satelit mikro buatan Malaysia yang pertama.

Satelit itu akan dilancarkan dari Baikonur, Kazakhstan di bahagian tengah Asia Oktober ini.

-- BERNAMA

AU RI